

NOVA HISPANIA.

vel maxime abundat. Metropolis est Legio, duodecim à mari Australi leucis. In agro illius centum xx millia barbarorum habitare dicuntur, omnes vectigales. Secunda Granada, ad lacum illum ingentem sita, qui inter mirabilia hujus provinciæ celebratur. Et cum non longe à mari Australi ordiatur, tamèn in Oceanum Septentrionalem longo & angusto ductu abit. Tertia nova Segovia in mediterraneis sita circa locum, ubi in angustias se colligit, & fluminis instar ad mare devolvitur. Est & municipium Rejalejo haud longe à portu Possessionis, ut vocant, & mari Australi.

Atque omnes hæ Provinciæ, quas hactenus descripsimus, vulgo Novæ Hispaniæ nomine censentur, & amplissimos redditus quotannis

regi Hispaniarum subministrant. Nam præter argenti gazam, classe illa, quæ quotannis è portu S. Ioannis de Ulloa solvit, in Hispaniam importantur preciosissimæ merces, imprimis autem nobilissima illa cochenilla, & varia aromata, balsama, aliaque quantivis pretii. Tota autem regio ad hunc diem indigenis frequens est, quorum plurimi Christianam fidem amplexi jugum Hispanicum non admodum inviti ferunt; plurimi adhuc barbaris institutis mordicuſ adhærentes pristinam ferociam & odium in advenas servant, inter quos Chichimecæ omnium crudelissimi, & pugnacissimi ingens damnum non raro tam Hispanis quam illorum servitiis & subditis dederunt, & etiamnum dant,

